

摘藻堂四庫全書薈要

集部

欽定四庫全書薈要

集部

清閔閣全集卷二

二

臣董誥詳校

詳校官助教臣謝登雋



欽定四庫全書蒼要

清閔閣全集目錄

卷一

四言詩

五言古詩

卷二

五言古詩

卷三



五言律詩

五言絕句

六言絕句

卷四

七言古詩

卷五

七言律詩

卷六

七言律詩

卷七

七言絕句

卷八

七言絕句

卷九

樂府

贊

題跋

卷十

雜著

尺牘

卷十一

外紀上

卷十二

外紀下

臣等謹案清閔閣全集十二卷元倪瓚撰瓚字元鎮號雲林無錫人畫居逸品詩文不屑屑苦吟而神思散朗意格自高不可限以繩墨明天順間宜興蹇朝陽有刻本至萬曆中其八世孫理等復為彙刊凡十五卷歲久漫漶惟毛晉所刊十元人集本行世

國朝康熙癸巳上海曹培廉重為編定校勘付梓多所增補凡詩八卷禱文二卷外紀二卷

上卷列遺事傳銘並贈答弔挽之作下卷專載諸家品題詩畫語毛晉又嘗刊雲林遺事于集外別行培廉裒為一編瓚之文章行誼備歷無遺其校勘體例亦較毛本為精善云
乾隆四十一年五月恭校上

總纂官

臣紀昀
臣陸錫熊
臣孫士毅

總校官
臣陸費墀

清閔閣全集原序

東吳當元季割據之時智者獻其謀勇者効其力學者售其能惟恐其或後而有甘抱清貞絕俗之態卒閔其用全其身而不失其所守者非篤於自信不能也錫山倪雲林先生是焉先生諱瓚字元鎮雲林其自號也家故饒於貲至先生始輕財好學嘗築清閔閣蓄古書畫於中人罕跡其所愛寫溪山竹石攻詞翰皆極古意性甚狷介好潔絕類海岳翁然尤善自晦匿有若愚駭無

似盡棄其所蓄如敝屣然卒之扁舟獨坐焚香弄翰以
與漁夫野叟混跡於五湖三泖間又類天隨子既而昭
代御宇遂使六合一統底今且百年矣彼之倖功譽於
一時者飈馳電迅泯無聲跡之可尋而獨先生詩畫流
落於人世雖片紙不啻拱璧耽玩之際猶覺清風灑然
使人為之興起噫謂非篤於自信者能然乎先生之詩
僅嘗見於題咏近得常之荆溪寒君朝陽彙梓五七言
古律絕句總若干卷走書京師俾予評之以傳予謂其

清新典雅迥無一點塵俗氣固已類其為人然置之陶
韋岑劉間又孰古而孰今也邪太羹玄酒不和而自醇
朱絃疏越一唱而三歎有遺音者矣朝陽讀書好義高
先生之誼而重其才寶愛是集欲傳之無窮真可謂深
知夫詩而樂揚人之善者歟不然則是編也其不至於
湮沒無聞者幾希故不辭而為之序天順四年歲舍庚
辰菊月既望翰林院侍讀學士奉直大夫直文華殿雲
間錢溥書

欽定四庫全書蒼要卷一萬六千五百四十七

集部

清閔閣全集卷一

元 倪瓚 撰

四言

至正十年十月廿三日余以事來荆溪重居寺
主邀余寓其寺之東院凡四閱月待遇如一
日余將歸迺命大覺懺除垢業使悉清淨乃
為寫寺南山畫已因畫說偈

我行域中求理勝最遺其愛憎出乎内外去來作一作止

夫豈有礙依桑或宿御風亦邁雲行水流遊戲自在乃
幻巖居現於室內照宵中山厯厯不昧如波底月光燭
盼睐如鏡中燈是火非絳根塵未淨自相翳晦耳目所
移有若盲瞶心想之微蟻穴堤壞輾然一笑了此幻界

義興異夢篇

辛卯之歲寅月壬戌我寢未興戶闔於室爰夢鬼物黯
淡慄慄或禽而角或獸而跣夔足駿奔豕形人立往來

離合飛搏跳擲紛攘千態怪技百出于茲泊然抱沖守
一廓如太虛雲斂無迹晨雞既鳴冠櫛斯畢涉庭而詠
已化奚恤春風惟振亮月在席凋瘁何損榮華匪益獨
以圓悟境無順逆愚夫說夢轉墮迷惑滔滔天下病者
良極僕我大雄拯此羣溺

至正乙未素衣詩

素衣內自省也督輸官租羈繫

憂憤思棄田廬斂裳宵遁焉

素衣涅兮在彼公庭載傷迫隘中心怔營彼苛者虎胡

恤爾氓視氓如縱寧辟尤詒禮以自持省焉內疚雖曰
先業念毋盪失守而不遷致此憂鬱身辱親殆孝違義
屈蔚蔚荒塗行邁靡通雖雖鳴鳳世莫之逢夕風淒薄
曷其有旦吁嗟民生實罹百患先師遺訓豈或敢忘簞
瓢稱賢樂道無殃予獨何為悽其悲傷空谷有芝窈窕
且廓爰宅希靜菽水和樂載弋載釣我心不忤安以致
養寤寐忘憂修我初服息焉優游

徐良夫耕漁軒

鄧山之下其水舒舒林廬田圃君子攸居載耕載漁爰
讀我書唐虞緬邈愴矣其悲棲遲衡門聊得我娛敬慎
誠篤德罔三二四勿是克一作事三益來一作斯萃彼溺於
利我以吾義彼自暴棄我以仁智匪今之同惟古是嗜
虛邪逍遙隱約斯世

題畫

義興之山維水瀾瀾載遊載咏操觚挾几聊樂一日百
歲奚俟

五言古詩

春日雲林齋居

池泉春漲深徑苔夕陰滿
諷咏紫霞篇馳情華陽館
晴嵐拂書幌飛花浮茗盃
階下松粉黃窻間雲氣暖
石梁蘿蔦垂翳翳行蹤斷
非與世相違冥棲久忘返

次韻懷張外史

緬懷蕭閒館乃在華陽天
焚一作燒香坐幽一作當陽
谷濯纓向

清泉真靈浮空至樓觀與雲連
彈琴明月下飄飄舞胎仙

雨中寄孟集

英英西山雲翳翳終日雨清池散園文空林絕行屨野
性夙所賦好懷誰共語燒香對長松相與成賓主

聽表子方彈琴

蕙帳凝夕清高堂流月明芳琴發綺席列坐散煩纓迴
翔別鵠意縹緲孤鷺鳴一寫冰霜操掩抑寄餘情

贈天寧福上人

荆溪霜落後銅官日出初自櫛頭上髮更理篋中書上

人從定起咏言方繞除邂逅發微笑幻身同太虛

十二月十七日過與之洛澗山居留宿忽大雪

作及明起視戶外巖岫如玉琢削竹樹壓倒
徑無行蹤飄瞥竟日至暮未已雪深尺餘因

賦詩留別

世途縈荏苒歲晏不知歸密雪竹林夜挑燈共掩扉蕭
條塵慮淨諷咏玄言微遇此巖中賞心事悵多違

別張天民

鳴雁將北歸徘徊舊棲處江湖春水多欲去仍回顧稻
梁豈余謀繒繳非所慮猶為氣機使暄冷逐來去寥寥
天宇寬彼此同一寓風萍無定蹤易散聊為聚君看網
中魚在疾猶相煦

夜泊芙蓉洲寄張鍊師

芙蓉猶滿渚疎桐已隕霜泊舟菰蒲中吳山隱微陽因
懷靜默士竹林闕玄房煮茗汲寒澗燒丹生夜光憶與
鄭郊輩閒咏步修廊時子有所適顧瞻重徜徉庭下生

苔蘚牖間繙詩章奕勢鄭老勝酒榼郊生將雅歌雜談
諧列坐飛羽觴子歸日已晚素粟亦傾筐揮手輒謝別
暮宿荒城傍遲明趨所期待子鄭公堂晨往遂至昏企
望徒俵俵乃嗟仙真馭固非世所望惻惻理歸棹泛泛
秋浦長還尋甫里陸更醉山陰王素冠斯馳贈喜知終
未忘余茲將遠適旅泊猶彷徨微風動虛碧初月照石
梁曠望對清景賦詩託陳郎茯苓思同煮夜雨共匡床
蕭閒道館聽表南宮彈琴是日風雨蕭然有感

而作

玉琴轉清亮風雨更飄飄
疎桐蔭高館朱槿耀芳條
生
物曷可遏撫事發長謠
弱齡陪清讌擲髮想垂髫
相見
日以老離居夢且遙
秋江眇雲水去鶴影搖搖

送高太守之秦郵

秦漢置牧守猶古之侯伯
封建而郡縣仁政固不易
漢
宣知所本留意二千石
慎哉高侯車願循古轍迹

蕭閒館夜坐

隱几忽不寐竹露下泠泠清燈澹斜月薄帷張寒廳躁
煩息中動希靜無外聆窅然玄虛際詎知有身形

和吳寅夫對雨見懷

溽雲變陰晦零雨隨風濤的皪集蓮池飄飄灑蘭皋朱
絲緩瑤瑟綠錢生寶刀撫事增慨慷端居倦遊遨處世
每慙柳懷人徒詠陶脆質愛靈藥閒情宣弱毫

次陶蓬韻送葉叅謀歸金華

手把玉芙蓉青天騎白龍出入人間世飛鴻踏雪蹤瑤

草粲可拾羣峰森玉立璧月掛天南離離星斗溼君昔
在山時玉韞山有輝因同白雲出更與白雲歸白雲無
定處豈只山中住河漢共縈紆經天復東注金華牧羊
人遊戲不生嗔笑拂巖前石行看海底塵手調白羽箭
陋彼磨銅硯一語不投機歸歟寧再見士豈始隗乎全
趙匪相如項王疑亞父竟爾龍為魚擾擾何時已百年
聊寄耳良也報仇歸言從赤松子去山今幾年還山大
學仙天台司馬宅雲氣近相連

偶成

積雨不為休蕭條使人愁哀吟四壁靜病卧百蟲秋開
門望原野江湖漭交流誰能載美酒為我散煩憂

次曹都水韻二首

杜陵布衣翁許身稷卨行賦詩原正始感事多哀傷煌
煌萬丈焰岌岌數仞牆君能仰餘輝假日尚一作高升堂

弛擔息荒途日暮將安之挾彈狂遊子鬪雞輕薄兒衆
方巴人唱獨歌陽春詩天門何嚴邃綠窻隱果魚

贈錢羽士

鍊師好神仙望拜金母臺
疊疊應玄運煌煌秀靈爇
天風流瓊響夕露調玉盃
鳳棲池上竹雨添階下苔
時見兩青鳥碧海傳書來
感此忽自笑飄然遺氛埃

送甘允北上

翔鴻縱高姿流水去不息
枉道別友生揚舲望京國
婉孌前途憩蕭條餘景匿
神京衣冠會左右金陽宅
驅馬流星繁垂軒春霧集
嘉子玉質朗早通金閨籍
行逢明

主顧入補詞臣職束帶向晨趨陪讌終日昃芳年易為
晚所願崇令德英英白雲飛渺渺青山隔秋風應節起
萬里思親客遲子返舊居銜杯數相覲

雙寺精舍新秋追和戎昱長安秋夕

秋暑晚差涼茗餘眠獨蚤清風振庭柯寒蚤吟露草晨
興面流水西望吳門道不知人事劇但見青山好

寄段吉甫

昔者段干木踰垣避其君冥翳巖穴間清風扇炎氛德

綿百世下吉甫賢且文神驚養竒采芳芷結幽芬回視
當世士雞鶩正紛紜區區事夸效子獨介不羣舍瑟作
而嘆此道誰復云

送章鍊師并寄鄭有道

良覲忽云徂桐花今亦繁落日滿洲渚揚舲念孤騫因
懷息機叟蘊真從灌園晨掃石上雲佇子接清言

玄文館讀書

有引

余友玄中真師在錫之東郭門立靜舍名玄
文館幽潔敞朗可以閒處至順壬申歲六月

余寓是蕙旬謝絕塵事游心澹泊清晨櫛沐
竟終日與古書古人相對形忘道接脩然自
得也且西神山下有泉味甚甘列與常水異
館去山不出五里故得昕夕取泉以資茗薈
余讀書研道之暇時飲
水自樂焉乃賦詩記事

真館何沈沈寥廓神明居陽庭肅宏敞丹林鬱扶疎
曠言茲遊息脫屣榮利區檐榭初日麗池臺涼雨餘焚香
破幽寂飲水聊舒徐潛心觀道妙諷詠古人書懷澄神
自適意愜理無遺誰云黃唐遠泊然天地初回首撫八
荒紛攘蚍蜉如願從逍遙遊何許崑崙墟

述懷

讀書衡茅下秋深黃葉多原上見遠山被褐起行歌依
墟里間農叟荷篠過華林散清月寒水澹無波遐哉
棲遁情身外豈有它人生行樂耳富貴將如何

蛛絲網落花

落花綴蛛網蜀錦一規紅既暎綺疏外復照碧池中含
悽戀餘景散魄曳微風昔人問榮穢詎識本俱空

冬日窻上水影

日池浮湛澹霞牖上縈迴敷腴三素雲照耀青蓮臺高
流輝自下含漪斂復開尸坐以默觀靜極自春回

雪泉為王光大賦

高齋面絕壁林密徑難尋風落松上雪零亂幽澗陰皓
潔映鶴竚清圓和瑤琴閒咏以自樂聊用忘華簪

丙子歲十月八日夜泊閭門將還溪上有懷友

仁陸徵君

明發辭吳會移舟夜淹泊空宇垂繁星微雲暝前郭沈

沈抱冲素悄悄傷離索歸掃松徑苔遲君踐幽約

聽袁員外彈琴

有引

至正四年十一月袁員外來林下為留兼旬臘
月十七日快雪初霽庭無來跡與僕靜坐因取
琴鼓之古音蕭寥如茂松之勁風春壑之流冰
員外時年八十有二顏貌筋力未如四五十許
人為言甫弱冠遭逢盛明初宰當塗過九華山
道逢神人與棗食之後數數見夢寐間若冥感
玄遇者員外韜耀蘊真仕祿以自給不為
人所知豈郭恕先之流歟為賦五言以贈

郎官調綠綺谷雪賞初晴兩忘絃與手流泉松吹聲問
言踰八十云嘗見河清掛帆望九華神人歛相迎啖以

海上棗歡愛若平生玄遇寧復得惜哉遺姓名

早春對雨寄懷張外史

林卧苦泥雨憂來不可絕掀帷望天際春風吹木末飛
蘿散成霧細草綠如髮念子獨高世南山修隱訣取瑟
和流泉操瓢酌明月神安形不彫跡高行自潔思之不
可見饑渴何由歇願為鸞鶴翔南遊拂松雪

懷常州學博強行之

君在西溪上年年楊柳春提壺坐柳下邀我見情真青

葉已垂帶白花還覆蘋別來今見柳思爾采芳芹

戊寅十二月丹丘柯博士過林下有賦次韻答之

積雪被長坂卧疴守中林山川雖云阻舟楫肯見尋
傾盖何必舊相知亦已深驚風飄枯條清池冒重陰
聯翩雙黃鵠飛鳴綠水潄顧望思鬱紆徘徊發悲吟
願言齊羽翬金石固其心歡樂胡由替白一作黃髮期滿簪

己卯正月十八日與申屠彥德遊虎丘得客字

余適偶入城本是山中客舟經二王宅弔古覽陳迹松

陰始亭午嵐氣忽斂夕欲去仍徘徊題詩滿苔石

送友仁之京師

春風吹蘭茝佳人將遠遊
遠遊何當還神京鬱雲浮
矐言英邁志飛轡不可留
豈無金閨彥與子結綢繆
河山風氣雄江水日夜流
遙瞻雲中雁庶以慰離憂

啄木

何處啄木鳥飛止於喬林
微形亦以勞終日聞其音
所願木向茂不使蝨日侵
吁嗟人之徒曾不如鳥心

江陰袁仲徵作軒名篔簹林日夕嘯咏其下至正
十二年二月廿四日訪余南蘭陵寓舍徵僕
賦詩遂走筆應請然不能盡道軒中清事也

風生篔簹谷雲迷渭水原蕭蕭春雨後翳翳清陰繁憶
昔文使君燒筍具盤飧彭城詩適至大笑飯為噴風流
成異代寂寞今誰論夫君暨陽隱字徵其姓袁二仲接
徠遊子猷時到門冠同薩縣製坐對宜城尊翠羽共棲
托鳳雛亦孤鶩載誦偃竹記忽若聞清言邈哉古人跡

尚友不可謾

杜真人聽松軒

計籌白石頂聞有丹丘生和玉飲晨露
寒林飡絳英止
鶴眠松警螢火照書明為善得仙道
翛然不近名

擬陰常侍一首寄劉祕監趙員外

幽并游俠地都城百雉連河漢
瞻疑近雲鳧信是仙樓
分霞欲曙花將月共妍
擣毫傾藻思獻賦足為傳
還知
跨烏鵲夜宿綵雲邊

玉壺中插瑞香水仙梅花戲咏

寒梅標素艷幽卉弄妍姿團團紫綺樹共耀青陽時折
英欲遺遠但恐傷華滋置之玉壺冰芳馨消歇遲

秋夜賦

清漏下數刻疎鐘仍獨聞零露溥夕影端居澄俗氛恬
淡斯寡欲榮名非所欣樂矣咏王風忘年棲白雲

述懷

嗟余幼失怙教養自大兄勵志務為學守義思居貞閑

戶讀書史出門求友生放筆作詞賦覽時多論評白眼
視俗物清言屈時英貴富烏足道所思垂令名大兄忽
捐館母氏繼淪傾慟哭肺肝裂練祥寒暑并釣耕奉生
母公私日侵凌黽勉二十載人事浩縱橫輸租膏血盡
役官憂病嬰抑鬱事汙俗紛攘心獨驚罄折拜胥吏戴
星候公庭昔日春草暉今如雪中萌寧不思引去緬焉
起深情實恐遺親憂夫何遠道行遺業忍即棄吞聲還
力耕非為螻蟻計興已浮滄溟雲霧龍蛇噬不復辨渭

涇邈邈巖澗阿靈芝燁紫莖有志而弗遂悲歌歲崢嶸
冶長在縲絏仲尼猶亟稱嵇康肆宏放刑僇固其徵被
褐以懷玉天爵非外榮賤辱行豈玷表暴徒自矜蘭生
蕭艾中未嘗損芳馨

泊舟

泊舟嘉樹下開牖碧江潯慨然念黃落景憇惜清陰多
暇觀魚鳥容與一登臨蛻跡塵喧久欲寡天機深

寄王光大

春服始輕體嘉樹欲垂陰夫椒結秀色江流涵碧深晴
絲正高下好鳥亦嚶吟豈無伐木詩怡此風雩心

次韻酬友人

處世若過客踽踽行道孤願友吉德士邈焉如鳳雛人
而無恒心未易為醫巫往者不可作玉匣埋珠襦枳棘
何榛榛上有鴟梟呼維桐鸞棲止來匪應時需卓犖干
里馬壯氣塞九衢駑駘豈其偶齷齪當鹽車龍可豢而
致魚鮪固充厨未聞商山翁受廛稅以徂俗人難與言

長吟野踟躕青松在澗壑坐閱霜柳枯所嗟鄭亂雅復
惡紫奪朱至道安可言多金豈禎符忽為璧壘者憔悴
悲路隅箏瓢咏王風耿耿心勤劬

次韻姑蘇錢塘懷古六首

西子承吳寵餘蹤見古臺空遺昔時月無復昔人來臺
邊越兵路幾見起兵埃

釀酒劍池水玉壺清若無揮盃送落月山鬼共歌呼松
間燈如漆白骨漫寒蕪

耕鑿古隧穿乃吳桓王墓金雁隨冷風黃腸畢呈露物

情

一作悲歌

異今昔踟躕緩歸步

仙人悲世換宴景在清都寒暑自來往英雄生釣屠錢
塘江畔柳風雨夜啼烏

江山國破後弔古一經行輦路苔花碧御溝菰葉生古
跡今寧有新城江上橫

南山靈石澗翠壁掩松關張君已厭世乘螭遂不還蘿
磴餘幽躅今復誰躋攀

贈惟寅

隱几方熟睡，故人來叩扉。
一笑無言說，清坐澹忘機。
衣上松蘿雨，袖中南礪薇。
知爾山中來，山中無是非。
三十不娶妻，四十不出仕。
逍遙巖岫間，翳名以自肆。
何曾問理亂，豈復陳美刺。
高懷如漢陰，終老無機事。

送惟寅

春江煙靄綠，遠樹明晴旭。
歸雁影斜斜，鳴聲斷復續。
陳君掛帆去，似與雁相逐。
水際白雲度，山中甘雨足。
安得

從耦耕柴門藝松菊去去且入城懷抱向誰傾姚公有
古道虛夷多遠情俾爾遂高隱狂歌樂幽貞

至正二十三年正月廿日余與諸友集於貞松

白雪軒其地林石竒勝窻牖明潔且主人好
文尚古有文武材款坐設有醴相與嘯咏以
小謝雲中辨江樹分韻各賦得辨字

境靜塵慮清雨餘山光變池館闕虛閒琴酌申繾綣蔚
哉春木榮憩我飛翮倦石間有題字苔蝕已難辨

對春樹

端坐對春樹影落身上衣美人手所成
紉縫願無違步
庭悲往躅瞻景惜餘暉芳襟沾露溼
蘭珮委風微凝思
自的的染澤尚依依
晨雞催夢短夜鵲逐魂飛
歡愛自
茲畢憔悴損容輝

送致用游閩

韓衆禹穴來語我長生訣
偶坐聽春雨雨止即言別
乃知茅君山貞居相往還
山經許寄我依依師友間
貞居

登真久識子十年後掣箱出遺文猶作蛟鼉吼子去遊
七閩漁浦桃花春白鷗飛送爾停橈採綠蘋幔亭幾日
到言笑邈無因憑將棹歌去歌向武夷君

送馬生

送子淮南行繫舟江岸柳翠影舞晴煙落我盃中酒舉
杯向落日春水浮天碧時見白鷗飛雪光翻綺席應笑
披羊裘獨釣江邊石

寄楊廉夫

吳松江水春汀洲多綠蘋
彈琴吹鐵篴中有古衣巾
我欲載美酒長歌東問津
漁舟狎鷗鳥花下訪秦人

寄李隱者

南汀新月色照見水中蘋
便欲乘清影緣源訪隱淪
君住鈿山湖綠酒松花春
夢披寒雪去疑是剡溪濱

寄韓介石

江上雨雲歇夕陽歌吹濛
朱絃彈綠綺令我憶韓衆
魚戲弱藻下鳥飛明鏡中
夢乘清浦月直過雪溪東

次韻呈張德常

陶公興寓酒杜老愁亦酌豪傑千載人處世何磊落吐
詞蔚忠義安貧務簡約嗟哉嚇腐鳶邈矣鳴臯鶴

朱火

朱火日方永涼風拂琴絲麋鹿遊臺苑燕雀悲火帷蕩
然京輔地無復漢官儀衆芳日蕪穢陰凝方自茲

寄穹窿王者

山雲淡縱橫幽鳥跂上下寂寥非世欣自足怡靜者平

生卧遊趣屋壁何勞寫

一作畫

還期煮茯苓地爐同夜話

題原道西溪草堂

春水孤村迴荆溪
晷晷西晚日鳴榔起
山雨竹雞啼櫻
桃花已落蘼蕪綠
未齊酒船尋賀監
蚤晚到幽棲

煮石山房

汲澗煮白石雲棲南澗隈
敲石發新火荆薪藉餘灰
坐候升降理靜觀寒燠媒
遂忘石鼎沸乍疑山雨來
丹成同此術鶴化詎能猜
我亦飡金液清淺笑蓬萊

出郭

我初來城郭新綠餘薔薇今我既出郭秋蓮落紅衣郊
居豈為是市隱勿云非去去將何從西山行路微塵空
夸昆海游潛四月餘賦歸亦無家塊處蝸牛廬身世一
逆旅成虧分疾徐反已內自觀此心同太虛

聽錢文則彈琴

牛鳴野笳中雞登山木上黃鐘雜姑洗春容以清亮別
鵲暮鳴飛流水春演漾愛爾絃手忘令我形神暢憶昔

擅能事宋袁余所向錢君生獨後超軼絕塵鞅操琴晚
聞道月斧揮天匠杳如清廟瑟朱絃聽歎唱古道久寂
寥古音亦淪喪促軫淚沾纓歌詩重悲悵

贈王仲和

荒城夜風雨草木曉離披桂馥逗虛牖苔文滋硯池弄
翰聊寄逸永日以自怡且盡一日樂明朝非所知

酬張德機見贈

嘉藻枉我前令人意也消展咏當庭前一作除清陰起涼

飈出何去巖穴隱何逃市朝仙師赤城霞旦旦起神標

贈張士行

雲門有逸客非仕亦非隱玉井千尺泉此士難汲引結
交雲林叟不顧俗嘲哂我拙唯任真子德常戒謹相知
既有素力學仰顏閔久別見容色英姿固天稟欲踈不
能忘欲褻不可近

贈友生

春林積雨晴汀

一作江

渚煙波綠谷鳥語綿蠻澗泉聲斷

續蘿徑無來蹤空山聞伐木時援清琴坐還同白雲宿
九日過彥行和韻二首

蕩舟煙景晚舉杯當素秋黃花忽在眼白髮已滿頭臨
流發悲歎援琴歌楚調罷席更淹留明月波間照何事
鹿皮翁逃名隱屠釣

九日喜初晴登高向何處山色見微茫波光淡容與鼓
柁逐鷗看雲覓新句適值無懷民相對澄神慮

對酒

題詩石壁上把酒長松間
遠水白雲度晴天孤鶴還虛
亭映苔竹聊此息躋攀坐久日已夕
春鳥聲闐闐

贈野處民

水聲轉屋西山翠浮屋東牀
前苔滋雨門外松吟風怡
然無世一作外慮心廣神為充
曲肱以飲水至樂在其中
擊壤歌往古寧知事王公

靈鶴辭

陶公職仙署子良亦冥通
所修楊許業存思在祝融
周

卿宅丹元末屑仰仙宗神明接祈禱虛夷恒恪恭飛霞
煥玉檢流響徹金宮白鶴翔香煙僊僊載冷風舞影綠
雲上命侶青田中晨去瑤草春暮歸海塵濛真靈忽降
室羽車儼浮空步虛酌明水逶迤清夜終

陸德中祈雨有感

辟穀清虛久晨窻飡絳霞濯神咸池水宴景丹元家憂
國悲民瘼旱郊起雷車枯魚出涸轍槁苗生稻花我住
清江渚種芹遶江沙忽乘蓮葉舟贈我仙掌茶擬訪安

期生為覓棗如瓜

臥病

早憂命觴竿抱疾忽經旬止酒卻腥腐端居謝喧塵麓
穢除內滯清虛以怡神江雲載飛雨飄飄灑衣巾矯首
詠玄虛精思侯仙真道園遊恬淡心兵息狂狷冷然風
濤靜鼓柁銀河津戒哉貪饕子病原果何因

清閔閣全集卷一

欽定四庫全書蒼要卷一萬六千五百四十八

集部

清閔閣全集卷二

元 倪瓚 撰

五言古詩

與全希賢

臥疴久不憚微瘳起行吟徑苔無來跡出門江水深懷
我平生友金蘭契同心欲共一尊酒道遠力不任有客
闖我戶晤言樂中林飄蕭綠髮僊亦見雪滿簪取琴與

子彈悠悠山水音能成伐木詩歌以慰所欽

酬友生

擁褐南軒

一作榮

下晨暎暖似春忽思王子晉醉著白綸

巾遊宴無冬夏清狂忘主賓能持麀鹿脯寄與不羈人
尋友人不遇

洲渚多落英泝流尋遠山輕舟載美酒搖蕩綠波間俯
詠拾瑤草遐思隘塵寰黃緣忽失遇悵望遂空還

次張仲舉韻

秧疇時已遍午饑休中林忽聞軺車至攬衣欣慨深遂
尋修竹下共憩西澗陰汲泉以煮茗遐哉遺世心

薛常州讓田詩

延陵古吳地秦伯有遺風仁讓自家國士民知孝忠春
暉草心碧日暮荆花紅為感使君政嗟時誰與同

潘公鳴臯軒

白鶴稟靈質翩翩有竒姿海月比高潔巖雲共逶迤池
上菖蒲花春煙紫綵綵飛鳴聊飲啄乘風來下之我登

鳴臯軒遂賦鳴臯詩安得赤玉笙

一作

鶴上吹參差

為張來儀賦匡山讀書處

廬山鬱岩堯上有香爐峰影落碧天外翠玉琢芙蓉牽
蘿讀書處雲磴無行蹤猶遺石巖苔花開紫茸愁心
飛春雪寶劍沈雙龍應化蘇耽鶴歸棲千歲松山巖採
芝叟久別倘相逢

瞻雲軒

有引

金君伯祥名其先君墓左之室曰瞻雲軒蓋以寓夫孝思油然而義也若夫祖父之魂氣

精神其脗合感通之妙齋思則如見敬祭則
來格開牖而天光臨鑿池而泉脈動洋洋乎
如在其上如在其左右者雲豈足
為喻哉於是廣其義而為之賦詩

白雲起石上迅逸如迸泉
汎演乎林莽飄飄乎山川飛
霞共聯絡凱風與周旋
開軒滌遐想我思何繇繇
顧瞻忽在茲亦復停披馬
卷舒無定理變幻徒縈纏
興念松下塵若承鶴上仙
空花結浮翳百態交我前
戚欣從妄起心寂合自然
當識太虛體勿隨形影遷

張鍊師祠醮感致瑞鶴賦贈

我識白雲君尚友赤松子仙署閱清嚴社公隨役使步
虛禮初日飛神謁鈞天時有五白鶴翩翩一作飛飛遶香煙
手栽千樹桃風吹劫灰盡避世星壇西深竹聞清磬儻
來密霧集忽遂冷風還窗裏遺瑤瑟空中鐫珮環

題趙若巖龍山精舍

我生倦馳驚無機如漢陰重遊古蘭若對山開我襟風
流李謫仙賞靜諧夙心琅然哦新詩如聞大雅音回首
石林晚白雲花雨深

詠蓮

迴翔波間風的歷葉上露清池結素彩華月映微步雲
陰花房斂雨歇芳氣度欲去拾明璫踟躕惜遲暮

送陳惟允之金陵

雪消江水綠花發冶城春白下烏衣處輕舟去問津指
日望京國行歌非隱淪好及三釜養歸來以榮親

徐氏南園對雨

櫻桃花欲落風雨暮淒迷忽憶郊園日竹林通澗西弱

蔓滋野援蘭葉長芳畦念我當時友蒿萊沒舊蹊

春日有感

春岸生蘼蕪春風生蘭茝夢見平生歡美人今何在丹
槁玄以白忽忽容鬢改年邁誰能復憂來誰與解

七月廿四日風雨寂寥與玄度集宗道南窗具
酒肴宴談遂以永日因賦

蕭條風雨秋沉寂窗牖晚故人山中來杯酒意勤懇斂
眉念乖濶握手話情悃千載鶴怨悲九時蓬萊尊市脯

良不易枯魚雜乾脰

一作
饌

浮雲幾翻覆人事非余忖得

時寧足誇失勢焉用憤荆溪丘壑多松水饒芝菌結茅

駕厓巔雲棲且安穩瑤草手堪摘

一作夏清
冬與燠

何事鋤與

畚逐逐闌闌遊戚戚塵俗混張子邃古學林君業務本

達人解其會畧近宜志遠鍾氏曷仇嵇司馬亦藉阮鹿

遊姑蘇臺鳥下長洲苑麻姑固狡獪蓬萊歎清淺七袞

吾已老一簣君宜勉後會未可期作詩陳繾綣

為方厓畫山就題

摩詰畫山時見山不見畫松雪自纏絡飛鳥亦閒暇我
初學揮染見物皆畫似郊行及城遊物物歸畫筭為問
方厓師孰假孰為真墨池挹涓滴寓我無邊春

題驪山圖

校獵上林苑洗馬昆明池霜威肅笳鼓雲氣畫車旗馬
班陳賦咏衛霍綏蠻夷王風既未遠文明方在茲逶迤
霄漢上鳳皇尚來儀

為徐有常畫葉湖別墅

葉湖水淪漣松陵在其西望見吳門山波上翠眉低白
蘋晚風起寒煙遠樹齊水蕉籠華檻一作筆格露柳罩金堤
居貞寧汲汲旅泊自棲棲屏處觀魚鳥風雨夜烏啼

題墨竹送顧克善府判之高郵

高郵古淮甸世產不乏賢顧君往佐郡才華當妙年歌
詩隱金石八音以相宣侈哉錦囊句雅甚朱絲絃而此
艱虞際撫事一愴然饑者易為食君能念顛連何以贈
子行墨竹霜節堅

三月六日同李徵士遊禪悅僧舍禮上人出柯
博士所賦詩以示僕而博士君歿已二年展
誦為之悽斷因次其韻於後

佛生七佛後乃知青出藍寒月留孤光世人徒指談嗟
余墮狙網朝暮逐四三悲歎明鏡塵何由息禪龕

題畫贈岳道士

義興岳道士野鶴如長身我知彌明徒不是侯喜倫結
喉吟肩聳鐵脊霜髯新手中石碁子頭上漉酒巾久居

離墨山自謂無懷民喪亂不經意松陵留十旬香雲作
輿衛長松為主賓既滋數畦菊復種二畝芹樂哉以忘
死道富寧憂貧為我具舟楫相期桃花春

題畫贈徐李明

梓樹陰當戶時聞好鳥鳴獨攜一壺酒展席坐前楹招
邀白鶴侶吹弄紫鸞笙杳杳日景晚紛紛飛絮輕風翻
竹影亂明月已東生

龍門茶屋圖

龍門秋月影茶屋白雲泉不與世人賞瑤草自年年上
有天池水松風舞淪漣何當躡飛鳧去采池中蓮

畫贈呂志學

江雲昏絕巘汀樹猶斜陽獨立霜柳下渺然懷故鄉歸
來茅屋底篝燈寫微茫

畫竹贈志學

綠竹飽霜雪歲寒無荏容風至天然笑復愛夏陰濃寒
者不能移德比柏與松豈若桃李榮春花但丰茸

畫竹寄友人

先春競桃李凌陽歎蒲柳謝君靜者徒種竹安所守亭
亭清淨心鬱鬱霜雪後賦詩寄遠懷此君真可久

西老圖

弔古歎流俗高人陳太丘開窗玩蘭雪邀我畫瀛洲池
上哦一作賦清詠林間恣遠遊悠然遂永日下榻更淹留

題畫贈九成有引

至正十二年三月八日冒風雨過九成荆溪
舟中劉德方郎官放舟煙渚留宿談詩明日

快晴移舟綠水岸下相與嘯咏仰睇南山遙瞻
飛雲夾岸桃柳相廁如散綺霞掇芳芹而薦潔
瀉山瓢而樂志九成出片紙命畫眼前景物紙
惡筆凡固欲騁其逸思大乏騏驥康莊也歐陽
公每云筆硯精良人生一樂書畫同理余亦云
焉時舟中章鍊師岳隱者對奕吳老生吹洞簫
故人郟掾史邀我宿溪船把酒風雨至論詩煙渚清晨
興就清盥思逸愛春天復遇武陵守共尋花滿川

黃本中書齋為寫寄傲窗圖

庭樹綠交蔭時鳥語清絲春竹羅徑筍夏花敷沼蓮慨
然三季後契彼義農前古井汲修綆空齋絙素絃長歌

歸去來悟悅陶公賢終尋桃花掩息景窮幽玄

送賢良北上

吳山朝靄外閭門春雨餘
超忽孤帆遠天末浮雲舒
君今北闕遊我棲南山廬
荷鋤事耕作閉戶咏詩書
高林鳴禽曙青苔行跡疎
還期茅檐下一柱故人車

惻惻行

三月十五日陸玄素將從梁鴻山歸吳松之上是夕坐至夜分始別余入舟賦此追至梁鴻山寄之以定及冬重來之約

惻惻復惻惻憂思從中發感子遠來訪畏子遽言別不
有同心人何以慰孤寂矧茲春夏交蕭艾盈路側江水
亦浩漾風帆還飄突行將阻攜手轉覺意忽忽交好匪
在今高誼敦自昔人生寧無別所悲歲時易坐歎辛夷
紫還傷蕙草碧僕夫竊相告怪我悲憤塞山中梁鴻棲
江上陸機宅井曰今燕穢鶴唳亦寂寞余往經其孺徘徊
但陳迹天地真旅舍身世等行客汎汎何所損皎皎
奚自益修短諒同歸數面聊歡憚

寄張外史

神鷲戲玄圃，巨鱗偃演渤。爾亦碧巖中，遁形修隱訣。燒
香庭竹淨，洗研池苔滑。撫弄無絃琴，招邀青天月。跡高
行亦苦，冰蘖忌芳潔。何當往相尋，拂石棲松雪。

次韻別鄭明德

思君阻言笑，三歲同一日。既見令人怒，不見令人憶。揮
觴縱詭浪，抗論殫今昔。世方雜涇渭，已乃忘得失。饒涎
飮甘美，醉眼亂朱碧。少逢人眼青，每遇俗眼白。不隨世

混混自喜心得得講學日光輝盡性久循率不意吳市
門尚復有此客茅齋素壁上佳句手自摘楓林已搖落
梅蕊尚未折吁嗟歲云暮感歎終日夕殘生能幾面念
此氣填臆富貴真可羞功名竟何物世事蟹登筮危機
猩著屐翁乎善自守氣體保寧逸去去勿重陳且復混
玉石

贈張以中

吾友張以中少年如老翁因過修竹裏邀我碧巖東琥

珀松醪釀玻瓈茗碗紅子端今已矣千載事同風

答張鍊師

安居已度夏卧病乃經秋朝菌悲影短風萍歎波浮寸
田勤自治德宅可歸休慎勿與時競心境似虛舟

贈陸有恒

學行美德業孝弟為本根朝益以暮習夏清而冬溫無
逸勤稼穡幹蠱持戶門勿為習俗流必念古義敦謹身
尚節儉從善報蘭蓀堯舜雖有子朱均乃淫昏瞽絲何

頑凶子也大聖尊蓮固生污泥木可為犧尊簡編蝨蟬
出各有至理存惟人異禽獸暴棄湮其源惟學必由本
根深見枝蕃於何繡鞞悅外飾奚足論安宅正路間爾
居行爾轅斯道邇且易至樂不可諼

次韻張伯琦

長歎悲人寰彈琴想天際夏殷禮相因孰謂周可繼大
道久榛蕪高才日凌替遺書歎不泯授受豈有二鄒孟
道性善宅路喻仁義後生事言說慨彼涕沾袂允矣二

三子仰鑽互立志松柏受命獨歲寒鬱蒼翠誰歟無媿
作夙駕尋吾契

贈友

一作律詩

父子相師友周南義理門阿翁如玉潔賢嗣似春溫舍
後自生筍堂陰亦樹萱西山近在望靜默以忘言

吾友陸友仁甫舊得古銅印一紐以示余辨之
文曰陸定之印以名其子而字之曰仲安友
仁既沒仲安求為賦焉

吾友伯仁甫覽古閔世盲示我古印章始得自幽并辨
文曰定之釋義為爾名既名字仲安勗哉在敬誠仁甫
今則亡緬懷涕沾纓繫昔黃太史結交漢米生手持玉
刻文螭紐交縱橫上有元暉字印刻與弗輕殷勤字其
兒祖父冀可繩久矣學業懋繼述暉芳英書畫比二王
價重十連城高躅思仰止景行爾其行

韓伯休

韓康抱淵靜匿影以逃名亦有梁伯鸞五噫出漢京諒

哉古賢達道與人俱貞不以身徇物物固莫之櫻胡為
貴目前狗苟且蠅營粗計一時得不禍害乃生爾其繩
祖武景行尚勉行

略上人松月軒

虛牖宿閒雲長松掛明月道人初定起淨境無炎熱手
持青鸞帚衣掃石上雪冷然滌心塵寂照光不滅

和拙逸先生閒居韻

芻豢非所悅甘我藜藿味無辱奚必榮知足方可慰客

行值炎天嘉木予來墜禁汝忿愆心養此浩然氣見義
思必為奮若泉感沸學焉苟無成斯亦不足畏

寄良夫契友

昔者安豐董朝耕暮讀書親樂以妻順山樵而水漁徐
子慕古義林卧獨端居彈琴咏王風窅然觀化初月窻
淡疎竹跣跌當久如

附次韻

徐達左

故人雲山表日事琴與書霽然重交義不肯忘樵漁
奚奴將錦囊來覓水竹居佳畫入幽趣
雅句復古初七袞不成報高風慕相如

答徐良夫

八月七日偕耕雲叟訪耕漁隱者風雨寂寥
中為留三日有圖書筆硯之樂九日耕漁賦
詩見贈次

韻奉答

雲卧雨聲集庭樹颯以秋身同孤飛鶴心若不繫舟燕
俎登松菌匏尊斟澗流蘭芳日彫悴吾生行歸休不作
螻蟻夢遊神鳳麟洲青山澹相對白髮忽滿頭仙去雲
冉冉風鳴竹修修諒哉伐木詩鳥嚶尚相求居吳二十
載未及茲山遊君才如鮑謝摘詞亦云優歡然敬愛客

能不為爾留桑土夙所徹戶牖何綢繆地無車馬塵路
轉巖穴幽既晴引飛屩回望林間樓

附錄謝雲林處士耕雲照磨見訪

徐達左

涼風起幽壑蟋蟀鳴素秋之子從何來飄然駕輕舟
蕭散古冠帶乃若晉風流須眉既皓皓吟嘯方休休
永懷眉山學氣逸鸚鵡洲能書誇草聖善畫追虎頭
嗟哉市井人白眼看前修鶴鳴溪渚陰自為同氣求
握手叙心素忘形誠舊遊為子下塵榻再宿情思優
雖無盤飧美蘋藻聊淹留開懷寫高興彼此情綢繆
况有王衍談臨清偕討幽
期看丹桂月尊酒登南樓

次徐山人與雲林贈答詩韻 高 啓

昔遊紫藤塢空山鶴鳴秋相望隱人居興闌竟回舟

邇來獲晤賞玄談劇風流每欲開南軒招我共偃休
天寒鴻雁鳴芰荷落長洲豈無一釣船訪子溪水頭
終慚文墨牽只尺成阻修聽雨掩閣卧觀泉上巖遊
朝覽贈答篇詞藻誇兩優我本丘壑人猿鶴肯見留
擬結歲晏期壺觴展綢繆况聆西澗濱
禪宮闕清幽夜看太湖月遲我同登樓

倪元鎮山水圖為胡中書頤題次韻

載李文正公麓堂續稿

移尊向別圃展卷開清秋上有千仞峯下有一葉舟
蕭蕭虛籟響脈脈寒谿流時則當改序吾方賦歸休
鴻鴻謝高侶鸚鵡思芳洲種松少三徑栽橘無千頭
卜居擬南國仰止懷前修松泖昔遁跡蘭陵多勝遊
往事勿復道遺蹤猶可求畫圖與詩卷天地長為留
辭榮獲高價所直亦已優生也諒云晚感之念綢繆
恨無雲霄翼暫此林亭幽
眼中人老矣空憶仲宣樓

題高士圖

僵卧雪塞戶汝南表邵公冠蓋洛陽冷掃雪見高風冷
竈不生煙虛筇久塵蒙投謁非吾事舍君其誰從

道翁先生取余棄筆戲成五言因次韻

生與硯為隣惟知楮穎珍饑鳶雜吟嘯那用憂空困天
矯鍾王跡道媚骨肉勻澄懷靜臨寫時時見天真

吳淞山色圖

一作
律詩

吳淞春水綠搖蕩半江雲嵐翠窻前落松聲渚際聞潘

郎狂嗜古容我醉書裙鼓柁他年去相從遠俗氛

惟寅友兄雅志林壑遠寄佳紙命僕寫圖賦詩

因作此以寄歲己亥五月八日

齋居誰為友毛穎與陶泓有客附書至云是楮先生潔
白中含素柔滑表至精愛此風林意更起丘壑情寫圖
以閒咏不在象與聲

至正乙巳五月三日過開元精舍希遠首座為
設湯餅煮茗焚香相餉明日將還穹窿寺因

寫竹枝賦詩贈別

僧夏已安居還山寺在郭初心了
玄解自不為律縛度
水獨浮杯采苓時負鑷余亦漫浪人
枵然慚獲落

余自與庸叔別後不相見近十載矣
今年冬邂逅吳下班荆道舊殆若隔世
因寫霜林遠岫圖并賦詩以贈

賀公雅吳語嘗誦少陵詩遠孫有古風
隱居淮水湄開
牖望青山尋真歌紫芝鏡湖似清淮
煙濤春渺瀰何當

棹酒艇與爾相娛嬉永言以鼓瑟獻酬斟酌之伊昔龍
眠莊山水含清暉松桂蔚佳色田疇足耘耔結茅飯松
朮忘年樂熙熙贈此以為好同心勿乖違

廿二日贈別耕雲

王君瑚璉器清鑒涵水鏡忍窮如鐵石居易安義命鳳
兮出非時不與凡鳥並勤勞世勲胄忠孝本天性白圭
絕微瑕朱絃駭羣聽任直唯疾讒亂雅猶惡鄭悄悄愠
迫隘咄咄恥奔競西壠松桂林白雲森相映巖僧同棲

金定四
卷二
止林叟答嘯咏於時無美刺托物善比興藹然顏淵樂
陋彼原憲病瑗乎知非久慧也安心竟怡性壽而康克
戰道斯勝蕙草秋更綠松聲寒愈勁何當戲玄洲相期
適遐迴

廿三日聞耕雲至北村將來此

自余來南村忽忽數日矣犬豕混人目烏鳶聒人耳不
見佳友生如逃空谷底足音聞蚤然云胡而不喜

曹君達卿婁江西渚隱君子也自號古民息景燕

處以禮義悅心亦不求知於人今年七十三而
耳目聰明體力強健有三男子皆能愉婉其容
色以為養又信而智古之樂以悅生優游以供
老者吾昔聞而今見之矣耕學叟命為之詩

隱處婁江渚逍遙古逸民苔石作牀坐青山為主賓商
巖黃綺輩北牖羲皇人漁郎問津去源上桃花春

蘧廬詩

并序

蘧廬子蔡質子賢也

有逸人居長洲東荒寒寂寞之濱結茅以偃息
其中名之曰蘧廬且曰人世等過客天地一蘧

盧耳吾觀昔之富貴利達者其綺衣玉食朱戶翠箔轉瞬化為荒煙蕩為冷風其骨未寒其子若孫已號寒啼飢於塗矣生死窮達之境利害毀譽之場自其拘者觀之蓋有不勝悲者自其達者觀之殆不直一笑也何則此身亦非吾之所有况身外事哉莊周氏之達生死齊物我是遊乎物之外者豈以一芥蒂於胸中莊周我所師也寧為喜晝悲夜貪榮無衰哉予嘗友其人而今聞其言如此蓋可嘉也庚戌歲冬予凡一宿蘧廬賦贈

天地一蘧廬生死猶旦暮奈何世中人逐逐不返顧此身非我有易晞等朝露世短謀則長嗟哉勞調度彼云財斯聚我以道為富坐知天下曠視我不出戶榮公且

行歌帶索何必惡

寄叔方

乖阻方徂秋忽然已改年樓前櫻桃花開落東風顛米
船到家日雨砌溜涓涓綠酒仍滿眼素琴久無絃呼我
共斟酌歡劇更惘然處窮則已固言達誰當先俯仰歎
鳶魚浮沈各天淵慎勿傷本性木雕而土埏鸞翔安可
挽青雲氣翩翩猶羨羲皇人清風北窻眠

癸丑八月訪耕雲高士於西巖因寫耕雲軒圖

又為之詩

芝田耒耜間石廩山雲滿渚際荷衣翻巖前蘿帶緩垂
露藹輕帷芳池沃清盥霞餐非腥腐物化自修短空困
未足憂服食滋損幹

宿王耕雲山居

城市厭煩燠江山玩清遠盥濯臨石湖吟嘯望雲巘范
公遊集地登陟塵情遣悽悽靡遺構鬱鬱猶荒苑仙人
王子晉抱道雲舒卷鳳吹翔河汾鶴巢耒棲偃涼風縱

逸棹溪水清
澗澗何當采
靈芝忘年從
嵇阮

周遜學辭親秋暑將事于役因寫幽澗寒松圖

并詩以遺之亦若招隱之意云

秋暑多病暘征夫怨行路
瑟瑟幽澗松清陰滿庭戶
風聲雜湍激古音奏韶
蕩張幄儼停雲垂帷粲
露諒哉如金玉周子美
無度息景無狂馳笑言
以胥晤

附次韻

周南老

冷冷澗底泉迢迢溪上路
陰壑生松風好山當牖戶
瞻茲幽貞居歸來已遲暮
應門幸有子茲行迫王度
願言早還家衰年慰言晤

拙逸先生賦古意見招次韻奉答

楚狂昔悲歌鳳兮何德衰行邁心搖搖齊青麥離離雨
雲歎輕薄交道傷嶮巖鴻鵠志自遠燕雀棲其卑風吹
枳棘叢月照琅玕枝姦慝與賢智邪正亦易推忠本由
怒立義豈為利移矇子分瞭眊履蹈知醇疵折柳以樊
圃狂夫尚睢睢不以禮自防言動輕乖宜友焉不以道
異端固紛披君看枯魚泣魴鯉慎所之

題吳仲圭詩畫次韻

元初真士嘗居嘉禾紫虛觀好與吳仲圭隱
君遊故得其詩畫為多今年十月余始識元
初即出示此幀命僕賦詩因走筆次吳隱君
詩韻題於上隱君自號梅花道人云至正廿

一年

辛丑

駕湖在嘉禾湖水春浩湯家住梅花村夢遶白雲鄉弄


一作
染

翰自清逸歌詩更悠長緬懷圖中人看雲杖枕榔

附梅花道人原韻

平林方漠漠野水正湯湯蒼莽日欲暮辛苦客異鄉
草店月迴合村路迂更長渡頭人散後漁父正鳴榔

清閔閣全集卷二



總校官庶吉士 臣張能照

校對官庶吉士 臣翟槐

謄錄監生 臣溫之誠

欽定四庫全書薈要

集部

清閔閣全集卷三

四

詳校官助教 臣謝登雋



欽定四庫全書薈要卷一萬六千五百四十九

集部

清閔閣全集卷三

元 倪瓚 撰

五言律詩

積雨

積雨生朝菌微風墮碧蓮鵝池汲書水鶴帳理琴絃
屐躡苔衣破窻承樹影圓空林無與語長夏曲肱眠

春日客懷

白鶴煙霧遠滄洲雲海寬
蘼蕪細雨溼桃李春風寒
沈憂鬱不解離緒杳無端
還憶郊園集琴醞共清歡

與張貞居雲林堂宴集分得春字

青苔網庭除曠然無俗塵
依微樵徑接曲密農圃隣
鳴禽已變夏疎花尚駐春
坐對盈樽酒欣從心所親

秋日寄謝叅軍

岩薨太華隱婉戀東山情
學本猶龍老詩工阮步兵
心期流水遠世事浮雲輕
公府饒才彥琅琅玉雪明

次韻寄王長史

示病維摩室端居無俗情清齋久絕飲白首不論兵露
壁蛩吟切風林鶴骨輕何時同

一作王

內史清咏向蟾

一作

相見
眼增明

賦雪舟

一舸星河渚空明玉氣浮懷仙李太白訪逵王子猷月
色一作明如可掇曙光疑欲流銀屏雲母障夢為笙鶴遊

寄王道士宗晉

王君舊隱地聞更結茅茨鶴氅春裁芋鵝羣雪泛池時
歌綠水曲不負碧山期夜雨生芳一作春草令人起夢思

題張德常良常草堂二首

一室良常洞幽深古大茅風瓢元自寂畦甕不知勞獨
出逢騎虎初來學種桃還應白雲裏遲子共遊遨

翠壁隣丹竈青楓背草堂琴書聊卒歲麋鹿自成行疊
澗一作澗水流杯滑飛花入座香寧無問津者及此繫舟航

悼項山清上人

幽曠山中樂飄飄物外蹤
梵餘閒憩石定起獨哦松
花落春衣靜雲垂澗戶重
依依種蓮處林暝只聞鐘

垂虹亭

墟閣春城外澄湖暮雨邊
飛雲忽入戶去鳥欲窮天
林屋青西映吳松碧左連
登臨感時物快吸酒如川

稽山草堂為韓致因賦

稽山讀書處應近賀公湖
碣月懸蘿鏡汀花落酒壺賣
藥入城市扁舟在菰蒲
逃名向深僻君豈伯休徒

俞子中見過

積雨衆芳歇新晴生綠陰獨眠方不愜多子復相尋
鳴鹿在春野啼鶯聞遠林余懷良已罄咏嘯罷清琴

邀張彥高

清風入庭戶野客意悠哉一與佳人別堦前生綠苔
參

差松影亂

一作鬱鬱
松陰晚

寂歷

一作
悄悄

竹扉開我有盈樽酒懸

榻待君來

用韻重寄

山齋秋聽雨高卧興悠哉鹿飲荒池水蝸耕石徑苔寶
瑟芳塵滿臨尊詎忍開長吟我有待躡屩子能來

贈簡上人

初公經閣裏復遇簡禪師好飲茅君酒狂吟杜牧詩錢
唐江上去楊柳花飛時帆影青山隔依依夢見之

題張氏叢竹軒

高軒自虛曠幽竹亦叢生苔石寒依玉風泉夜奏笙治
冠輕可著醞酒綠因名好折青鸞尾仙壇掃月明

遊善權洞

載宜興
縣志

來窺善權洞一上李公樓水映巖前引雲旌松際浮然
燈長不夜垂釣只虛舟欲讀吳朝刻真成冒雪遊

野眺寄友

一作賦
平野

見話幽人屋荒城落日遙川原

一作
遠

漫浩浩煙樹靄芊

芊野稻初收碧江魚上釣鮮何當剩沽酒直到爾門前

寄徐仲清

巖谷採靈藥蕭條棲遁情白雲簷下宿海鶴階前鳴燕

組登春茵晨殮脯竹萌詩憑五瀉水好過蘭陵城

贈劉道益并似陸明本

作賦雲間陸能詩鄴下劉悲秋多遠思
振柁作清遊竹冷侵衣屢窻虛見女牛
燈前一杯酒漂泊更維舟

賦德機徵君荆南精舍圖

結廬溪水南勝處

一作
事足

幽探夏果足山雨春衣染夕

嵐石歌招鶴磴門俯射蛟潭日日縈歸夢
蕭條雪滿簷

次唐綦毋潛宿龍興寺韻寄方厓

無家何處歸南渚有禪扉湘簟間秋水風

一作池

蓮墮粉

一作羽

衣硯池滋黯黯竹露淨微微社

一作秋

燕情如客撓

君去槩飛

贈謝長源

公子太傅裔好於湖上居捲簾微雨裏岼幘晚風餘古
刻秦斯篆玄經許掾書何當尋好事鼓柁及秋初

贈墨生

巖谷春風起桐花落澗紅隔水輕煙發收煤石竈中豹

囊祕玄玉鵝池生白虹
湯生法潘谷千載事還同

雲槎軒

已比溝中斷空思海上浮
隨雲秋沉沉貫月夜悠悠
無路通河漢憑誰問女牛
漂搖非有待吾道付滄洲

悼朱高士

秋日高人逝微霜蕙草摧
鵝羣空碧沼鶴影自層臺
應御冷風出疑隨密霧來
杉松暮蕭瑟撫事有餘哀

贈道益

昔者劉高士匡山曾結廬插籬培杞菊充棟著圖書鶴
影秋雲外蛩吟夜雨餘茂深繩祖武息景在林居

送徐元度還江西

悠悠西江水綿綿江上山借問離羣鶴孤飛幾時還白
雪亦忌潔青雲安可攀時時王子晉吹笙向人間

題元朴上人壁

蕭條江上寺迢遞白雲橫坐待高僧久時聞落葉聲鴟
夷懷往躅

一作事

張翰有餘情獨掉扁舟去門前潮未生

贈沈文舉

波光浮草閣苔色上春衣
楊柳鶯啼暗櫻桃鳥啄稀
榮名非所慕登覽竟忘歸
泐水宜修禊重來坐釣磯

七月十四日對雨

雨簷驚瀉瀑江漲忽通渠
古砌羅秋草荒畦綴晚蔬
稍開雲表月還掩篋中書
欲話幽貞意忘言已久如

寄虞子賢

天濶海漫漫崑山望眼寬
桃源迷晉世松樹受秦官
雨

蘇鹿迹

一作迹

遍霜梧鷺影寒封題數行字聊爾問

一作問竹

平安

徐伯樞歸耘軒作

歸耘向何處近在東膠山白雲宿虛牖釣艇當荒灣彈
琴送落月濯纓弄潺湲寸田勿稂莠所願勤治芟

贈張韓二君

張仲情何厚韓康誼亦深賦詩論宿好聚首契初心阮
籍惟須酒陶潛不解琴與君忘爾汝蕭散鶴鳴陰

次韻酬彝齋見詒二首

秋氣入幽居，階前樹影疎。
筋骸渾懶惰，服食轉清虛。
薄晚魚潛渚，新晴溜繞除。
茯苓期共煮，悵望苦吟餘。

荆溪丘壑遠，暇日得躋攀。
野客時相過，高人意自閒。
敲門看修竹，卜宅近青山。
勝事今寧有，幽吟一解顏。

暮春期潘徵君不至

風林驚宿雨，澗戶落殘花。
芳月忽已晚，幽期良恐賒。
黃鸝念求友，鸚鵡呼煮茶。
猶候續車至，心親寧憚遐。

義興王子明以竹菌餽余口占謝之

竹下拾煙菌筠籃初送將
亭亭似三秀楚楚異衆芳
猶帶雨露氣更懷泉石鄉
此日山中客筍蕨得新嘗

贈公遠

霜葉落欲盡晚山看更青
躡將沙際屐坐久水邊亭
倪仰已如夢漂搖同汎萍
稻梁非所戀黃鸝思冥冥

對雨懷張貞居

戶庭來遊絕園林飛雨滋
芳氣初襲蕙圖文復散池
栽

書恐沾溼聽一作溜謾懷思清溪已可汎方舟幸及茲

附次元鎮見懷韻

張天雨

玄句何蕭蕭咀味生華滋換著空頂幘把卷適臨池
憐君柔緩情起我淹留思
丘園歲將晏幽期方自茲

送僧

聞說四明道山川似若耶去依阿育塢還宿梵王家野

市一作封殘雪江船聚晚沙光公強健否持底作生涯

望井

贈王光大

荆溪王隱士相見每從容借地仍栽竹巢雲獨傍松青

苔盤石淨嘉樹綠陰重約我同棲迢迢高高第幾峯

聽雨

樓上看春雨玉笙悲遠天辛夷紅染

一點一作

筆芳草綠搖

煙冉冉侵書幌冥冥溼釣船新愁嫌點滴元不到鷗邊

送李徵君遊荆溪因寄王司丞

何處尋狂客故人王子猷花落庭前樹風吹溪上舟紫
筍生春雨綠蕒滿芳洲心隨酒船發悵望不能休

五雲書室

幽深隱者宅迢遞少微山
賀公鏡湖曲李白棹歌還
雨
几研苔碧風軒江竹斑
韓衆近何似晏景白雲間

雨霽呈德常

積雨琴絲緩沿階蘚碧滋
泥途方汨沒茅屋且棲遲
酒
向隣家貰杯從野老持
便應絲一作此去海上候安期

答明卿

林靄去鶴唳孤煙原上邛
稷澗綠雲滿換幘晴景暄
處
和斯遺隘抱冲自寡言
君亦固窮節衆溺何當援

張天民溪亭

晝畫溪亭月當窻影更妍朱絃彈綠水細柳舞春煙杜
牧何年宅山僧棲夜禪張公一杯酒獨醉羲皇前

雨几

雨几唯生睡村醪不解愁泥途深溺象身世眇浮漚徑
草紛披溼林扉慘澹秋何人富春渚五月披羊裘

寄張景昭

煙渚落日後風林清嘯餘輕舟下天際高人遺素書筍

脯炊菰米松醪薦菊菹子有林壑趣江海一迂疎

荒村

踽踽荒村客悠悠遠適情竹梧秋雨碧荷芰晚波明穴
鼠能人拱池鵝類鶴鳴蕭條阮遥集幾履了餘生

答光大

空谷枉嘉藻幽吟當素

一作
藻

秋詩鏗清廟瑟書聳屈盧

予學業余多愧才華子獨優飛鸞天外羽斯世邈難儔

寄東白上人

楓林散霞綺湖水淡秋煙忽憶白

一作北

麻漾初春掉酒

船羽客借繪具高僧醉棲禪何時來甫里痛飲菊花前

酬雲浦

尋真狎隱淪息景絕風塵屈子能安義陶公每任真山
中宜餌术江上憶羹蓴亦欲從棲遯柴車為爾巾

題丘氏壁

我愛丘君宅蕭然隱者風石邊蒙細篠井上植高桐墨
沼鵝羣白雲窻藥蔬紅咏歌當上巳修禊樂融融

桂花

桂花留晚色，簾影淡秋光。
靡靡風還落，菲菲夜未央。
玉繩低缺月，金鴨罷焚香。
忽起故園想，泠然歸夢長。

寄章心遠

江海章高士，相違已半年。
青山雲冉冉，白鶴影翩翩。
坐看神龜下行吟，秋水邊。
何當拾瑤草，遲子華峯一作山巔。

賦雪蓬

手把玉塵尾，身披素綺裘。
梨花縈夜月，柳絮入虛舟。
不

作饑鶯咏其如載酒遊因懷剡溪興煙水暮悠悠

輓張德常

孝弟由天性清貞有祖風宦遊江郭遠歸隱曲林通嗜
古真成癖歌詩信已工有才悲賈傅荏苒百年中

畫寄王雲浦

蕭散賢公子衡門似水清花間青鳥過砌下綠苔生山
色排簷入江波照眼明開圖想幽境欲為寫閒情

高進道水竹居

我愛高隱士移家水竹邊
白雲行鏡裡翠雨落階前
獨坐數書席相過趁釣船
何當重來此為醉酒如川

寄王叔明

能詩何水部愛石米南宮
允爾一作矣英才最居然
外祖

風釣絲煙霧外船影畫圖中
他日千金積陶朱術偶同

秋日贈張茂實

久客東海上秋風吹練裙
放言愛莊叟笑癖如綠雲
采藥清晨出哦詩靜夜聞
滄浪可濯足吾與爾為羣

期友人不至

山寺擁爐夜風聲如怒濤獨吟何水部還思王騎曹曠
達余所羨阻別心增勞來茲慰幽寂輕舟幸即操

義興吳國良用桐煙製墨將遊吳中求售賦詩
以速其行

生住荆溪上桐花收夕煙墨成羣玉祕囊售百金傳孰
謂奚珪勝徒稱潘谷仙老松端媿汝法已入玄玄

一作
桐法

更清
妍

題方厓墨蘭

蕭散重居寺春風蕙草生
幽林蒼蘚地綠葉紫瑤莖
早悟聞思入終由幻化成
虛空描不盡明月照敷榮

為唐景玉畫丘壑圖因題

丹經留玉斧真籙佩青童
蛻跡氛埃外怡情巖穴中
吹笙緱嶺月理咏舞雩風
欲畫玄洲趣揮毫清興同

題風竹圖贈于靜遠

故人于靜遠訪我到南湖
作黍蔬親淪開筵酒屢沽
臨

流同嘯咏剪燭尚歌呼長夜清無寐還為風竹圖

題畫

甫里林居靜江湖遠浸山漁舟衝雨出巢鶴帶雲還澆
酒松肪滑敷茵楮雪間春風一來過似泊武陵灣

為文舉畫泖山圖因題

華亭西畔路來訪舊時蹤月浸半江水蓮開九朶峯酒
杯時可把林叟或相從興盡泠然去雲濤起壑松

畫竹寄王彞齋

荆南山色裡翠竹密綠溪冉冉春煙薄冥冥暮雨迷
夢長蝴蝶化行遠鷓鴣啼舊日栽桃李清陰自滿蹊

題李遵道山居圖

披圖慘不樂日暮眇余思坐石看雲處空齋對榻時
世途悲荏苒墨氣尚淋漓惆悵騎鯨客於今豈有之

贈王生蒙泉

曉鏡拂秋水晴簷度白雲青春去浩浩艷蕊落紛紛
道在形神豫心由瞭眊分君其慎語默世事豈余聞

畫江天晚色贈志學

不見呂君久題詩懷不忘風聲渾落葉山影半斜陽獨
鶴來遲暮孤帆出渺茫為圖秋色去留寄讀書堂

題山陰丘壑圖寄趙士瞻

吾愛趙徵士清才能逸羣昔營山陰宅今在吳松濱月
牖自理詠春羹偏美芹遠懷松上鶴寫寄嶺頭雲

八月十五夜湖上翫月

平湖秋似練寒月白於銀泫泫衣上露青青水裡蘋歡

言一杯酒聊樂百年身茲夕對澄景况值高懷人

三月四日邂逅德方郎官九成掾史於荆溪之
上相從及旬而別因九成徵余畫并賦詩以

贈

荆掾學阮掾宛然西晉風百年聊復爾三語將無同載
酒來溪上看山入剡中孤帆逐雲影烟雨滿春空

題漁樵友卷

釣水復樵山逃名宇宙間一篙春水淨半畝落花閒鷗

鳥時親狎松雲共往還厭聞塵世事緬邈不相關

題畫贈王仲和

有引

南湖陸玄素高士幽居今王仲和居之水木
清華戶庭幽邃余嘗寓其家四年蕭然忘世
慮也仲和以此幀索畫竹石畫已并詩其上
以寫惓惓之懷玄素仲和外舅也故尤感余
故人之思乙巳
初月十七日

曾住南湖宅於今已十年叢筠還自翳喬木故依然雨
雜鳴渠溜雲連煮木煙何時重相過爛醉得佳眠

過惠山

重過湛公宅因嘗陸子泉佛香松葉裡僧飯石巖前市
駿唯憐馬池荒憶種蓮清心有妙契塵事久終捐

送宗天章歸廬山

屏風第九疊歸伴鶴巢松五老峯前路東林寺裡鐘宗
雷憂入社陶謝莽遺蹤我亦名山隱他年何處逢

題畫贈張玄度

有引

玄度好文學工詞翰藹然如虹之氣真江南
澤中千里駒也十二月十四日侍乃翁訪僕
江渚相與話舊跡蹊深動故園之感因想像
喬木佳石翳沒於荒筠草蔓之中遂寫此意

并賦詩
以贈焉

蕭條江渚上舟楫晚相過
卷幔吟青嶂臨流寫白鵝
壯心千里馬歸夢五湖波
園石荒筠翳風前悅浩歌

奉寄郊九成

州府今為掾風埃多厚顏
香芹渾滿澗去鶴未巢山
思逐春雲亂心隨野水閒
章君應話我樗散碧巖間

寄張德常

卜宅近溪西雲煙咫尺迷
晝眠同野鶴晨起候林雞
舊

種松三徑春栽菊滿畦來禽與青李囊致不封題

送王叔明

連榻臥聽雨劇談清更真少年英邁氣求子不多人仕
祿豈云貴貝琛非所珍當希陋巷者樂道不知貧

寫秋林遠岫圖贈約齋因題

五言韋刺史此地數曾遊無復綠陰靜空悲紅樹秋市
聲晨浩浩雲影暮悠悠徵士冲襟勝邀余共茗甌

賦謝王彛齋

不面纔經宿題書細作行心親情戀戀事往意茫茫酒
榼浮松莖羊腔截玉肪歌詩報佳貺期此共徜徉

三芳圖

丹桂月光落猗蘭琴調清獨憐秋鶴瘦相對夜江橫芳
烈誰先後才華孰重輕道心安有染無物惱閒情

題墨

一作題
墨竹

贈李文遠

義興李文遠墨法似潘衡麋角膠偏勝桐花煙更清紫
雲腴泛泛玄璧理庚庚安得龍香劑霜枝寫月明

題畫贈九成

吳山春雨淨江渚暮潮平解纜欣初霽開帆已到城剡
君有高趣樽酒慰閒情醉吐真丘壑毫端一笑成

畫竹寄張天民

良常南洞口聞有掃塵齋竹影春當戶泉聲夜遶階自
矜霜兔健安有魯魚乖截得青鸞尾因風寄好懷

贈陸隱君

甫里高人後風流有裔孫愛山仍愛畫留饌復留樽每

看雲眠石因尋竹款門今朝嵐翠溼應是雨翻盆

寓法藏禪寺

載宜興縣志

風雨入城府禪扉三日留清齋聊弄翰曉浴更梳頭石鉢香煙細經幢樹影稠移舟未褰霽少泊聽鳴鳩

浦城春色圖寫贈遜學

七閩嵐翠合山色浦城高春靄浮青壁晴曛醉碧桃吟猿儔木客飛瀑亂松濤夢入千峯裡雲霄一羽毛

聞鶯送別鄭徵士

春日陽關道鶯聲滿上林來從金谷曉飛度玉樓陰柳
嫩難分色歌停稍辨音明朝空解語人去落花深

新涼戲呈甘白

閒靜幽人宅蕭條樂圃亭炎暑決旬劇遠山當戶青涼
生猶病瘥愁解如酒醒卧看風篁影落月滿階庭

贈郭本齋

高人郭本齋輕舟東渡淮賣藥不二價向人多好懷世
方憂喝死我豈與時乖欲覓金光草相期弱水涯

畫贈耕雲

戢柵泊清陂禪居獨下帷軒扉雨寥落草木晚離披野
老無機事江鷗更不疑虛舟身世遠萍葉任飄吹

贈陳維寅

有跋

十二月九日夜與維寅友契篝燈清話而門
外北風號寒霜月滿地窻戶闌寂樹影零亂
吾二人或語或默寤寐千載世間榮辱悠悠
之話不以污吾齒舌也人言我迂謬今因自
若素履本如此豈以人言易吾操哉維寅言
歸因賦詩并書此為贈慎勿以示顯貴者必
大笑以為詛語也十三日
瓚書於蝸牛廬中歲壬寅

陳君有古道夜話赴幽期翳翳燈吐焰寥寥月入帷冰
澌醜酒味霜氣折珽絲明日吳門道寒汀獨爾思

六月六日雷氏客樓對雨一首呈維寅

無家隨地客小閣看雲眠涉夏雨寒甚似秋風颯然舞
驚悲鏡影飛雁落箏絃好轉船頭去江湖萬里天

題郭天錫畫 并序

天錫掾郎與予交最久死別忽忽二十餘載
念之悵悵如何可言錫山弓河上玄元道館
錫麓玄丘精舍其畫壁最多今或為軍旅之
居或為狐兔之窟頽垣遺址風景亦異雖予

之故鄉乃若異鄉矣不歸吾土亦已十年因
勝伯徵君攜此卷相示為之展玩感慨并叙
述其疇昔相與之所以然者其中有不能自
已也捉筆凄然久之至正二十三年歲在癸
卯十二月十日夜

笠澤蝸牛廬中

郭髯余所愛詩畫總名家水際三叉路毫端五色霞
米顛船每泊陶令酒能賒猶憶相過處清吟夜煮茶

十一月一日燈下戲寫竹石霜柯并題

久客令人厭為生只自憐每書空咄咄聊偃腹便便野
竹寒煙外霜柯夕照邊五湖風月迴好在轉漁船

惟允契友工為詩歌而圍棋鼓琴無一不造其
妙雖游名公卿間無意於仕進故寫竹枝奉
贈又賦此詩

岷江陳秀士棲隱闔閭城覓句仍工畫看山不愛名棋
枰消永日琴調寄閒情摩挲鬚髯美春苗紫過纓

寄友

吳淞江上宅青翠映丹楓欲覓幽人去遙憐雅好同珍
圖藏顧陸蓮社憶雷宗聞道秋風夜清琴寫澗松

八月廿日為叔平畫紫芝山房圖并賦

山房臨碧海奕奕紫芝榮
雲上飛鳧舄月中聞鳳笙
朮煙生石竈竹雪灑茆楹
誰見陳高士希尋善養生

有立徵君名其齋曰端居室讀書學道咏歌先
王之遺風於其中為之題贈

五畝幽人宅端居思次寥
圖書充棟積心跡去人遙
卷幔松風入當階蘭雪飄
善求顏子意陋巷樂簞瓢

徐良夫耕漁軒

僕來軒中自七日至此凡四日矣風雨乍晴
神情開朗又與耕雲耕漁笑言娛樂如行玉
山中文采自足照暎
人也喜而賦此詩

溪水東西合山家高下居琴書忘產業蹤跡隱樵漁積
雨客留宿新晴人趁墟厭喧來洗耳清泚遶前除

至正癸亥秋七月三日乘雨至西園因寫此圖
賦詩以紀勝遊

卜宅清溪上烹茶秋樹根書堂微雨霽石榻古苔痕松
葉飄琴薦荷香罩酒樽邵公敦古道幽尚竟誰論

宿樂圃林居

予來城郭而暑氣熾甚，偶憩甘白先生之樂圃林居，不覺數日相與蔭茂。樹臨清池，誦羲文之象，文、彈有虞之南風，遂以永日。忽忽已淹留，久如聞成。此詩以寓笑樂耳。甲寅六月十六日。

暮投齋館靜城郭，似山林落月半牀影。
涼風孤鶴音汀雲縈遠，夢桐露溼清琴喧。
卑靜塵慮蕭瑟動長吟。

為耕雲賦山居

高木垂帷密清池，拭鏡明蟲書葉字。
古風織浪紋輕悄。

悄悲秋意悠悠惜別情古人雖已矣得失未須驚

示友人

子處窮愁際我居憂患中貪饕如鬼國喜怒屬狙公莫
笑淮陰倪誰同鮑叔風雪汀留雁迹飛舞任西東

題梅花道人墨菜詩卷

肉食固多鄙菜烹元自癯曉畦含露氣夜鼎煮雲腴春
醪時一進林筍與之俱遊戲入三昧披圖聊我娛

孤雲用王叔明韻

煙浦寒汀雨吳山楚水春絕無凝滯跡本是不羈人鶴
鶴同棲息蛟龍任屈伸自嗟猶有累斯世有吾身

五言絕句

題臨水蘭

蘭生幽谷中倒影還自照無人作妍暎春風發微笑
和趙魏公張外史詠玄洲十景

茵山

奕奕三素雲團團如車蓋下有採芝仙游神與天會

羅姑洞

玉晨啓玄扉靈篇受飛仙鍊景返洞宮保真億萬年

霞駕海

混淪青瑤流煥爛雲錦光飛駟駕神君宛在甸山陽

鶴臺

胎仙集丹臺真宰降玄居翕忽神飈散燒香禮太虛

桐葉源

密葉蔭方壇珍林寄深谷華源遠莫窮時有幽人宿

玄洲精舍

步虛朝東華高嘯追遠遊玄館受妙道逍遙宴神州

紫軒

虛林想遺躅壇館廢仍存落葉歲丹竈清晨雲氣溫

隱居松

蒼雲乘白鶴傳說手栽松山室清眠夜千巖聞勁風

玉像龕

玉標明霞秀靈炁混合成流光映金宮雲旆招萬靈

題自畫二首

東海有病夫自云繆且迂書壁寫絹楮豈其狂之餘
青林巖曲密遠水間微茫飛鷺浴鳧處人家半夕陽

夜作古木怪石因題

夜遊西園渚初月光炯炯徒倚巖石下愛此林木影

雨竹

雨過瀟湘渚風生渭水波暮窻揮醉墨翠霧溼煙蘿

二月廿二日潘子素王叔明來訪臨別為寫水

傍樹林圖

積雨開新霽汀洲生綠蕒臨流望遠岫歸思忽如雲
寫竹枝為子中陳君

子中高世士脫帽著黃冠久勵冰霜操虛心共歲寒
題鶴

海月生殘夜遼天入暮秋安期應有待清唳起玄洲
題畫鶴

白鶴何僊僊翠石亦岌岌風日媚幽芳春禽飛相及

題王叔明小畫

餘不溪上路不到已三年
范蠡扁舟小披圖思惘然

題夏圭紈扇圖

孰識琴中趣山峩水深深
馬史妙於畫無言會古音

題畫三首

筆鋒雖小劣景物亦清新
蕭瑟風林晚江湖有逸民
杳杳碧山岑森森灌木陰
幽亭足清眺臨風聊鼓琴
江城秋雨後竹石曉蒼蒼
聊以規摹此留看宿鳳凰

荆溪

載宜興縣志

荆溪清遠地水秀石幽貞誰識懷歸者終期憤憤情

題秋亭曉色圖

園林夏雨歇旭日照蒼苔誰見竹亭裡孤坐興悠哉

寄友

風雨暮蕭蕭高人共寂寥何時截湘玉踏月夜吹簫

菜圃

食菜雖云美茶苦薺自甘猶勝高陽徒羶葷自飲酣

春江獨釣圖

春洲菰蔣綠江水似空虛望山以高咏釣志

一作意釣

不在

魚

墨竹

明月臨虛

一作書

幌疎篁舞翠鸞獨吟苔石上霜葉媚天

寒

題畫與溥泉

息景憩煙霞澄懷卧丘壑久遲蘇仙君莫驚松上鶴

題畫二首

荆溪山水勝不到十年餘蔣氏遺基上寒藤學草書
雨過黃陵廟風生湘水波當時卸帆處苔石倚喬柯

畫竹為景周寫

修竹種丹房亭亭枝葉茂青寧忽日生拾取延人壽

題畫贈彥貞二首

翠竹並竒石蒼蒼留古柯明窓坐相對試問興如何
遠山青欲滴疎林淡生煙春潮晚來急維定渡頭船

贈宋仲溫

宋君天下士畫竹能鼓琴來我北渚下相從論古心

題秋林圖

一作陳則題雲
林畫林亭遠岫

雲開見山高木落知風勁亭下不逢人夕陽澹秋影

六言絕句

田舍二首

山鳥下窺窻牖春風時過柴門避世何須鄭谷作書已

絕巨源

映水五株楊柳當窻一樹櫻桃灑掃石間蘿月吟哦琴
裏松濤

畫竹

珍重黃華父子遺風得似洋州松雪於今冥冥房山去
後休休

為曾高士畫湖山舊隱

厭聽殘春風雨捲簾坐看青山波上鷗浮天遠林間鶴
帶雲還

題畫八首

雨過黃陵廟下雲生玉女井邊野雉雠鳴斜日鷓鴣啼
破林煙

晝畫溪頭喚渡銅官山下尋僧水榭汀橋曲曲風林雲
磴層層

高柳喬柯小閣水光山色衡門未老作閒居賦無錢對
北海樽

舟泊溪流曲曲鳥啼煙樹重重獨思白鶴遺址好居五

老雲峯

孝侯廟前雨過
罨畫溪頭日曛
舊迹如今夢裏
春風愁亂行雲

月下參差雙玉
燈前蕭散孤鴻
寄興只消毫楮
寫懷不用絲桐

竹上誰彈清淚
如鉛春雨斑斑
滿眼湘江波浪
望窮白鳥飛還

高樹長松共晚
蒼筠野石同貞
珍重王家公子
翩翩白

鶴神清

南村草堂

雲溶溶兮覆渚波剡剡兮侵扉觀魚泳而自樂狎鷗馴
以不飛

雲溪佳處

誰覓雲溪佳處渚花汀竹迷巖去鶴原邊倚杖浮鷗波
上鳴榔

己酉八月廿六日謾題

田父聊同爾汝狂夫從問如何昔日揮金豪俠今朝苦
行頭佗

題竹

黃陵廟前雨過邯鄲谷口風生愛殺山人清致縱橫淡
寫秋聲

我愛焦君味道筆端點綴清新規模虎兒早歲未窺北
苑入神

題溪山雪霽圖贈以中張君

水影山容黯淡雲林翠

一作細

篠簫疎誰見重居寺裏雪

晴沙際吟餘

贈潘仁仲

瓶內花簪白鶴庭中池養金魚
馴虎只憑丹竈活人惟
留素書

燕乳

燕乳雛成竟去鸞悲影隻難雙
借問榮歸故里何如高
卧北窻

壬子十一月五日余遇牧軒於吳門客邸求寫
贈安素高士并賦

石潤苔痕雨過竹陰樹影雲深聞道安素齊中能容狂
客孤吟

至正癸卯九月望日畫贈勝伯徵君并題

江渚暮潮初落風林霜葉渾稀倚杖柴門闌寂懷人山
色依微

東吳十詠

望洞庭

一望洞庭秋水看

一作逢

南浦孤篷江干有興騷客閒

居久約漁翁

泛石湖

遙接太湖惘然尚留赤壁圖景越來溪水東西香雪寒
梅飄影

遊靈巖寺

此山勝景玄賞舊遊今日皆非籃輿林間烟暝爛柯谷

口忘歸

登姑胥山

吳王館娃西子兩情斷
送長流麋鹿淚沾荒草
故人汗漫重遊

泊橫塘

山寺微茫深渡寒煙蒼
莽橫塘杖梢自挑村酒
船頭猶夢漁郎

懷甫里

筇行依依故里石刊翰墨模糊龐公力田二頃拾遺扁
舟五湖

過盤門

將軍南過吳國魚龍跳下江湖無限吁嗟陳一作神跡怕

聞淒涼洞簫

過獨墅

短棹微風窈窕片帆落日橫斜舍傍誰開酒肆牛疲知
是田家

過車坊漾

蕩舟滄波萬頃搖
櫓白鷗渚傍不知新月東起回頭過
盡東方

歸闔閭浦

極目煙江盡頭屈指搖城渡口
世人不理曲肱自餉黃
雞白酒

題良常草堂圖

和靖處士嘗賦詩曰山水未深魚鳥少
此生猶擬再移居只應天竺溪流上
獨木為橋小

結廬以中之大父鶴溪先生自金壇移居
荆溪因以中相遇話處士舊詩戲為圖此

結屋正臨流水開門巧對長松為待神芝三秀移居華
岳西峯

至正戊戌八月便過岷翁出趙宗漢鴈山高隱
圖索題遂作短句聊博一笑

高閣突兀雲外細路委曲煙中對嶺臨溪未遠度阡越
陌難通

清閔閣全集卷三